

Agri & Allied Sector nung rangloker budget yanglu: CM Rio

Dimapur, Tsüklai/February 18 (TYO): Nagaland Chief Minister aser Minister in Charge of Finance, Neiphiu Rio-i February 18, 2021 nü Nagaland Legislative Assembly nung 2021-22 küm atema Budget benokba sülen osangbener dang ashiba agi, 2021-22 indang Budget ya nüburtem den peta renemogo.

Budget ya Agri & Allied sector tem aser state ya pei sasa arakzüa litetba economy ka kumdahtsüsü nung rangloker yanglu, ta ashi.

Jang-o-tzü, süngjanglijang, aonsotsü amala chiyongtsütema danga state nungi bener ar uba nung metaloka aliba COVID-19 ajanga temai adoktsüogo aser tarutsü nung pei poksünga alitsü atema sorkari mera balala atema inyakteptar, ta pai ashi.

Senotsü indokba ajemtsü atema sorkari mera balala agiba ajanga sorkar sentstüh crore 400 shi agi

ajemogo, ta pai ashi.

Chief Minister-isa ashiba agi, power sector nung state indang revenue kanga ajema akumer aser nüburtem asoshi ibai tang tongtipang rongdak ka lir, kechiaser Department sentstüh nung lir, aser Government sector nung terenlok bena arutsü atema aser revenue timba kumdahtsüsü atema iba budget ya Power, Transport aser Water Supply sector tem privatization akumtsü yimya nung amendaker yanglu.

Iba yagi private sector den kulem sür shilem agir timba kumdahtsüba nung rangloktstü, talisa water supply nung source owners, stakeholders aser nüburtem asoshi rongsenketsüing tajangzüik tali kumdahtsüsü aser kasa mapang iba ya ajanga sorkar sen indokba ajema akumtsü aser danga tesemtem nung sen indoktsü maongka angutsü, ta paisa ashi.

Assembly nung School Inyakyim metetdahtsü

Dimapur, Tsüklai/February 18 (TYO): 13buba NLA Session 7buba anogo pezübuba, February 18 nü MLA, Dr Chotisuh Sazo-i ken o ashishiba langzüba mapang Chief Minister, Neiphiu Rio-i, Covid-19 wara pokteter aliba ajanga Ration Card holder tem nem jang angati agütsütsü atema India sorkari 2020 küm April ita nungi November ita tashi nung jang agütsüba Nagaland-i PHH kübok 477,569 Qtls aser AYY kübok 84,306 Qtls agizükogo, ta metetdahtsü. Paisa, 2020 küm April ita nungi June tashi nung state-i dal 8,548.02 Qtls aser July nungi November tashi nung Chana 14,246.7 Qtls agizükogo, ta ashi.

Advisor, Water Resources, Namri Nchang-i, Sazo-i asüngdangba langzüa, state nung irrigation project tongtibang kecha mali, ajisüaka Department-i tang Surface Minor Irrigation Projects 270 benoka inyakdar, ta ashi.

Dr. Chumben Murry-i ken o ashishiba langzüba mapang Minister-in-Charge of School Education-i, HSLC tatidang nung sorkar school tem inyakyim osang tejangja agütsü. Pai ashiba agi,

state nung 2016 küm GHS overall pass percentage 28% liasü, 2017 küm 31%, 2018 küm 30%, 2019 küm 36% aser 2020 küm 42% liasü ta ashi. Maneni pai Government Schools nung class 9 & 10 kaketshirtem atema Science aser Mathematics asoshi Remedial Teaching Program, "The Teacher's Diary" benokba, institution tekolaktem aser subject tesayurtem asadangba sentong den orientation sentong balala ayongzüka agiba densema Department-i sentong balala benokba metetdahtsü. Department-isa, Tele/Radio Online Education, Online School Monitoring System, Online Teachers Transfer Portal, Teacher's APP, Free India 4.0 Education, DHIKSHA Coherent Access Project aser Gurushala Teacher Training Programme amala sentong balala benokogo, ta pai ashi.

Maneni MLA, Dr Chotisuh Sazo-i asüngdangba nung telangzüba agüja Minister for Rural Development-i, 2019-20 atema MGNREGA wage rates sen 191.99 liasü aser 2020-21 atema sen 205 lir ta ashi.

NLA-i bangzüng ka renema ayu

Dimapur, Tsüklai/February 18 (TYO): 13buba Legislative Assembly nung Chief Minister, Neiphiu Rio-i, February 18 nü Assembly bangzüng asadangtsü atema benok aser agizüka ayu.

August House nung, taoba mapang Nagaland Legislative Assembly nung Indo-Naga political ken o dak sendakba nung bangzünga aliba ajak pusemstü aser benoka inyaktstü atema telemtetba agia liasü. August House-isa, Indo-Naga yimden yimsüsüba ken o yimjung nung bentetstü atema India sorkar-i maneni Naga political talks ayongzüka agiba atema pelaba

metetdahtsü.

Maneni August House-i, Naga nunger yimden yimsüsüba telok, political party, lokti tentet balala, Arogo aser NGO temi Indo-Naga yimden yimsüsüba ken o yimjung nung bentetstü atema meranga inyakba atema pelaba lemsatepba den Naga nunger ajak ajangzüktstü atema ajak longjemtsü ayongzüik.

House-isa, India sorkar aser Naga nunger yimden yimsüsüba teloktem ajak tesem ka nung adenshia, nüburtem ajaki agizüktetstüsa telemtetba tajung ka takaratiba nung agitsü atema memenoi inyakteptstü mepeshi.

Chief Minister, Neiphiu Rio-i 2021-22 küm atema budget benok

Kohima, Tsüklai/February 18 (TYO): February 18, 2021 nü 13buba NLA nung Nagaland Chief Minister aser Finance-a repsema abensang, Neiphiu Rio-i financial year 2021-22 atema budget benokdang sen taruba ajak agi crore 22,451.28 asütsü aser teindokba ajak agi crore 22,816.61 asütsü, ta metetdahtsü.

Budget onük jembidang Chief Minister-i, wara anema tenokdangbatem ajanga state rongsenkettsüing nung kongshio; iba denji külemi rongsenkettsüing maparen ajak anenba agi saru magiba osettsüsettem dang shishilemba-a liasü; ibayongji State saru aser GST saru (State aser Central GST) mejungi kongshi, ibaji ajanga Central saru nungi state shilem ajema aküm, ta metetdahtsü.

Rio-isa, tang ama tensa ka nung state saru shilem 10 shi ajemtsü aser Central Taxes & Duties nungi state shilem crore 1,341.99 shi ajemtsü, ajisüaka wara tensa süngjemba ajanga State GST saru jenjang tajungba kümдар, ta metetdahtsü.

Chief Minister-isa, rongsenkettsüing tsütsü timtem adoktsü arendakba agi sorkari sen teindokba ajemtsü atema telemtetba kar agiogo, ta metetdahtsü; item rongnung Centre sorkari inyakba ama Dearness Allowances/Relief installment asem soita atatsü densema lir, ta metetdahtsü.

Sorkarisa Developmental Outlay (State Programs) shilem 15 ajemtsü aser mepaitoktetbatem dak alaka mapa nung tasen

meshimoktsü lemtet, ta pai metetdahtsü.

Sen teindokba ajemtsü atema telemtetba aika agiba ajanga 2020-21 küm sentstüh crore 2,314.13 shi nung dang tembangtsü; sorkar maneni sen tajemba indoktsü merangtsü, ta paisa ashi.

Department of Fire Services nem sen lakh 300 lemjüktstüogo; tang department-i Chiechama, Kohima District nung Regional Emergency Management Training Institute (REMTI) aser Regional Response Centre amenoktsü atema inyakdar, ta pai metetdahtsü.

Department of Treasuries & Accounts nem staff quarters asütsü atema sen lakh 150.41 lemjüktstü, Department of Border Affairs nem construction atema sen lakh 200 lemjüktstü, staff quarters asütsü atema Department of Parliamentary Affairs nem sen lakh 100 lemjüktstü, staff quarters asütsü atema Taxes Department nem sen lakh 90.56 lemjüktstü, training ground aser firing range atema Village Guards nem sen lakh 300 lemjüktstü, ta pai metetdahtsü.

EVMs aser VVPATs ayutsü atema warehouse yanglutsü asoshi Election Department nem sen lakh 150 lemjüktstü, State Houses asütsü atema Home Department nem sen lakh 150 aser disaster management atema sen lakh 50 lemjüktstü; Directorate building aser staff quarters asütsü atema Department of Tribal Affairs nem sen lakh 50 lemjüktstü aser Dimapur area nung construction mapa balala atema Department of Minority Affairs nem sen lakh 75

lemjüktstü.

Chief Minister's Corpus Fund kübok Planning & Coordination Department nem sen lakh 500 lemjüktstü; iba department-i Naga nunger kaketshirtem Ishwarpuram Institute, Fugoan, Pune nung skill development training agitsü atema sponsor süogo, ta CM-i metetdahtsü.

State Council of Educational Research & Training nem sen lakh 100 lemjüktstü; Aboi, Peren aser Wokha nung Polytechnics amenokogo aser reju asemprongla nungji taküm July ita nungibo academic sessions tenzüktstü.

Department of Youth Resources & Sports nem sen lakh 790 lemjüktstü aser iba nungjagi lakh 300 bo Government Higher Secondary school ajak nung class 12 nung azüngertem Career & Employability Skill Development Program atema lir, ta pai metetdahtsü.

Department of Urban Development nem sen lakh 350.16 lemjüktstü aser ibaji Kiphire nung office amenoktsü, Mokochung nung P. Shilu Ao Memorial Park yanglutsü aser Development Authority Nagaland indang marketing centre upgrade asütsü atema lir, ta pai metetdahtsü.

15th Finance Commission Awards kübok 2021-22 küm nungi health infrastructure, gari lenmang yanglushitsü, High Court Complex asütsü, Raj Bhavan tasen yanglutsü, mini landing strips aser district balala nung fire services facilities tajungba akumtsü densema project aika tenzüktstü, ta Chief Minister-isa metetdahtsü.

COVID-19 Nagaland: Taneptsü angur shilem 97.77 lir

Kohima, Tsüklai/February 18 (TYO): Nagaland nung Brehostibarnü COVID-19 tashidak

nisung ka dak jangjateta tang tashinung iba virus agi state nung nisung 12,191 dak jangjateta lir aser nisung trok taneptsü ngua tang taneptsü anguba shilem 97.77 nung lir, ta health ketdangtsüri ashi.

"Tanü Mokochung nung #COVID-19 +ve case ka liasü. Taneptsü angur trok liasü," ta Minister, Health, S Pangnyu Phom-i

tweet ka nung ashi.

Caseload nungi taneptsü angur nisung 11,919 aser active 29 lir, ta pai ashi.

Dimapur nung iba virus keta alir ka asüba ajanga state nung asür ajak senteper nisung 91 kumogo aser item rongnung nisung ter danga tashidak temeyoktep agi asü, ta Director, Health and Family Welfare, Dr Denis Hangsing-i anogoshi agütsüba COVID-19 bulletin nung shia lir.

Ajak senteper iba tashidak agi

meneper nisung 152 danga state temi ogo, ta pai ashi.

Mongulbarnü Nagaland nung COVID-19 nungi taneptsü anguba ya shilem 97.72 liasü, ta pai ashi.

District telemsa nung COVID-19 tashidak jangjateta aliba yamai alitsü: Dimapur (6,477), Kohima (3,873), Mon (605), Peren (507), Tuensang (248), Mokochung (193), Zunheboto (142), Phek (47), Kiphire (41), Wokha (39) aser Longleng (19).
(Maneni tapak 2 nung...)

NLA nung NFRBM (Amendment) Bill benoktsü

Dimapur, Tsüklai/February 18 (TYO): Tang temendak Thirteenth Legislative Assembly nung February 18, 2021 nü Chief Minister Neiphiu Rio-i 'Nagaland Fiscal Responsibility and Budget Management (Amendment) Bill, 2021 benoktsü atema temelaba agütsü. Iba Bill ya February 19, 2021 nü benoktsü.

Chief Minister aser Minister-in-Charge of Finance-isa Nagaland Fiscal Responsibility band Budget Management Act 2005 indang section 11 kübok nungdaka aliba ama 2020-21 küm indang first, second aser third quarter atema receipts aser expenditure indang yimyattem repringshitsü atema table nung copy ka benoka liasü.

Department balala indang

administrative report tem table nung benok aser item rongnung Department of Border Affairs; Department of Information Technology & Communication; Department of Science & Technology; Department of Tourism; Department of Economic & Statistics; Department of Renewable Energy; Department of Municipal Affairs; Department of Horticulture; Department of Labour; Department of State Institute of Rural Development indang Chief Minister-i benoka liasü.

Minister, Planning & Coordination, Land Revenue and Parliamentary Affairs, Neiba Kronu ajanga Directorate of Evaluation, Department of Planning &

Coordination indang Annual Administrative Report 2020-21 copy ka table süa liasü.

Minister, Health & Family Welfare, S. Pangnyu Phom ajanga Department of Health & Family Welfare indang Annual Administrative Report 2020-21 copy table süa liasü.

Minister, Transport, Civil & Aviation & Railways and Land Resources, P. Paiwang Phom-i Land Resources Department indang Annual Administrative Report 2020-21 benoka liasü.

Maneni Minister, Public Health & Engineering, N. Jacob Zhimomi ajanga Public Health & Engineering indang Annual Administrative Report 2020-21 benoka liasü.

“Covid-19 vaccination” indang tangatetba agütsü



Mokokchung nung aliba mulungtet telok tongtibattem den osangbenertem aser arogo tenzükerterem asoshi 'Covid-19 Vaccination' indang tali jangjashiba 'sensitization' sentong ka Mokokchung CMO conference hall nung akadang Mokokchung SDO (C) Dharam Raj IAS-i jembidang tangokba noksa nung angur. Mokokchung, February 18, 2021

Mokokchung, FEB 18 (TYO): Mokokchung nung tongtibattem mulungtet teloktem den arogo tenzüker aser osangbenertem atema 'Covid-19 Vaccination' dak sentakba nung sensitization sentong ka Mokokchung CMO conference hall nung ayongzüka katsüogo.

Iba sentong nung Mokokchung SDO (C), Dharam Raj IAS-i jembidang, Covid-19 vaccination Phase 1 aser Phase II mapatong inyaka aodang, social media ajanga nüburtem rongnung olulu adoka terata aliba ajanga aikati iba mozü (vaccine)-ji magii arur, iyongji shilem agirtem apara, ta

kuli ka ashi.

Tang tashi nung iba vaccine agiba ajanga temang nung timtem (side effect) adokba kuli tejangja nguteta mali, ta paisa metetdaksü. Covid-19 wara adoker külen nungi asenok ajaki iba wara den raratsü mozü (vaccine) adoktsü kanga yongyaseta ata saka vaccine adokerbo agitsü aikati arendaka bilemer, ta paisa shisem.

Ibai mozü tasen adokba ka asünung nüburtemi ratamataa bilemer südi, anungji, meratatsü atema nüburtem nem ibai angatetdaksütsüla aser iba atemaji mulungtet telok den arogo tenzüker aser

osangzürlurtemi peipei sabang ajanga nüburtem nem tangatetba agütsüdaksünür, ta paisa mepishia metetdaksü.

Dr. Yanger ajanga “Covid-19 Vaccination kechiba atutsüla”? Iba mozü atuba/agiba ajanga tajangzük kechi agütsür? Aser iba dak sentakba nung teinyaktsü aser tekümdangtsü kechisa lir, item indang tatongi aser angateta teratetba agütsü.

Mezüng Phase-ji health worker-tem atema liasü aser tang tanabuba phase-ji frontline worker-tem atema tuodak lir aser tasembuba phase-ji arishi küm 50 sür tema pur atema agitsü sorkar sentong lir, ta angazüker.

Dimapur nung Army recruitment rally agitsü

Dimapur, Tsüklai/February 18 (TYO): Army Recruiting Office, Rangapahar, C/O 99 APO-i sangdong ka ajanga Nagaland nungi temsüa aliba candidate tem Indian Army

nung züngoksemtüsü atema shimtsü asoshi recruitment rally Dimapur nung March 10 nungi 20, 2021 tashi agitsü ayongzüka aliba metetdaksüogo.

Iba dak sendakba nung rally

nung shilem agitsü jangrartem dang www.joinindianarmy.nic.in nung pei tenüng züngoksemtüsü metetdaksüogo. Tenüng züngoksemtüsü atema February 22 nü tashi lapoka toktütsü.

Nsonji Lake Project lapoktsüba sentong agiogo



Dimapur, Tsüklai/February 18 (TYO): MGNREGS kübok Nsonji Lake Project asüngsashi, lapokba sentong February 17 nü Sendenyu nung agiogo, kong Commissioner & Secretary, RD Neposo Theluo, IAS alakteta jaoker liasü.

Project lapoktsüba mapang Commissioner & Secretary-i, Sendenyu New, Thongsü-Sendenyu aser Lotsüphün VDB aser Centenary Memorial Park Committee-i, department-i agütsüba sen kanga kümdang amshia iba project mapang tatsüka tsüngda nung tembanga inyaka atema parnok nem tenüngsang agütsü.

Paisa, iba project takok ngua inyaktetba ya nüburtemi aremzüka ataba aser longjemer inyaka ajang lir ta ashiba den iba tesem Bio-diversity conservation aser eco-tourism destination ka kümdaktsüba atema tenüngsang agütsü. Pai ashiba agi, iba yimtsüng ya state aser India nung dang masü saka biodiversity conservation world map nunga inoksema lir, ta shia iba tesem eco-tourism tesem tongtibattem ka kümdaktsütsü atema tali temerangba inyaktüsü ayongzük.

Yimtsü nem tenem aser lenden densema ali tesadem maoja lir aser terenlok asoshi

lenmang sadema lapoka lir ta shia pai, iba yimtsüng ya bio diversity yimtsüng ka ama dang jangjatsü masü saka temaba jenjang nung kaket shisatsü bushiba, bushitsügdang tesem tongtibattem ka akümtsü imlaba lemsatop.

Theluo-i, yimdaklirtem dang tarutsü atema nükjidong tejangja ayutsü ajungshi.

Kasa mapang nung SBC Centenary Memorial Park Management Committee mendenbuba Gwasinlo Thong-i, Project inyakyim metetdaksü, kong pai ashiba agi, iba project ya "Nsonji" awatsüng aser iba temeket nung arem shiruru

NBSE-i online senden indang metetdaksü

Dimapur, Tsüklai/February 18 (TYO): Nagaland Board of School Education-i sangdong ka ajanga Institutions tekolaktem jenjang balala lemsar online senden February 26 nü 10:00 ako nungi tenzüka agitsü aliba indang metetdaksüogo. Senden nung Institutions tekolaktem shilem aser khuret indang, tenzüng ozüngtem, academic aser tatidang dak sendakba nung onük balala benoka sensak asemtsü.

Kasa sangdong ajanga Institutions tekolaktem (Govt. & Private) ajak iba senden nung kechi südir süka adentsüla, ta metetdaksüogo.

Jenang balala yamai alitsü:
1. Tawa upgrade asüba Secondary Schools/ Higher Secondary Schools Headmasters/ Headmistresses/ Principals
2. Tawa shimba Institutions tekolaktem (institution tekolak mapa tang mezüngbuba abenertem)
Züngoksema aliba institution tekolaktem shirnok iba jenjangi aiter, parnok ajak dang iba webinar nung jangrabangra adentsü metetdaksüogo. Senden ID aser Pass code District WhatsApp group tem nung mapa tatsüka lir agütsütsü, ta kasa sangdong ajanga metetdaksü.

2-Lane Kohima-By-pass atema ali taa agütsütsü

Dimapur, Tsüklai/February 18 (TYO): Deputy Commissioner Kohima, Gregory Thejawelie NCS-i, ali kiburtem dang Chainage 10+500 nungi Chainage 13+800 (Package - 2) nung 2 - Lane Kohima - By-pass atema ali taa Deputy Commissioner Kohima office nung February 20, 2021 nü 10:00 ako nungi tenzüka agütsütsü, ta metetdaksüogo.

Kasa mapang nung Chainage 21+000 nungi Chainage 29+960 (Package - 3) atema 2 - Lane Kohima - By-pass asoshi ali taa Deputy Commissioner Kohima

office nung February 22 nü 10:00 ako nungi tenzüka agütsütsü.

Iba dak sendakba nung ali kibur maitsü jangjatsü atema Village Chairman mesera Chairman-i shimba nisung office nung arua alitsüla, ta metetdaksü.

Ali kiburtem dang tawa tangokba passport size photos (scan masü) 4 aser Aadhaar card (Xerox)/ I.D Proof aser Bank Passbook (front page Xerox) copy ka bener arutsü metetdaksüogo. Ali kibur dak alaker shinga nema ali taa magütsütsü.

COVID-19 Nagaland: Taneptsü... (TAPAK 1 NUNGI...)

State nung COVID-19 jangjateta alibatem ya tsüngsü pua aoba nungi 5,072, armed forces personnel 4,675, danga state tem nungi meyipa shilangertem 1,871 aser frontline worker 573 lir, ta pai ashi.

Tang active cases ya Kohima nung 27 aser Dimapur nung ana lir.

Tang iba tashidak agi menepa alirtem rongnung ka dak timtem terara lir aser 28 dak iba tashidak agi timtem agütsüba mali, ta pai ashi.

Taneptsü angurtem ya Dimapur

nung 6,338, Kohima nung 3,781, Mon nung 594, Peren nung 506, Tuensang nung 246, Mokokchung nung 183, Zunheboto nung 139, Phek nung 47, Kiphire nung 40, Wokha nung 35 aser Longleng nung 10 alitsü.

Nagaland nung tang tashinung COVID-19 tashidak alitsü südi ta temolung melemeti sample 1,28,754 tendangogo aser item rongnung RT-PCR nung 74,513, TrueNat nung 37,290 aser Rapid Antigen Test nung 16,951 tendang, ta Dr Hangsing-isa ashi.

ajunga asüngsanshitsü aser kasa mapang nung MGNREGA kübok mapa inyaktetnem nem mapa inyaktüsü atema maongka agüja taa agütsütsü nükjidong nung tenzüker aser iba den rongsen maneni aadak lenmang ka mesapoka ayutsü atema eco-tourism tesem tongtibattem ka kümdaktsütsü temulungdang yur inyak, ta ashi. Paisa, iba project ya 2019-20 nungi 2020-21 tashi nung sen lakh 42.978 intoka inyak ta ashi.

Sentong nungsa Director RD Imnukshila Jamir-i o jembiba mapang, bio-diversity wazüka ayutsü atema maparen balala benoka inyaka asoshi national aser international jenjang nung kümtem tsüngda naroküm balala anguba yimtsüngtem nem tenüngsang agütsü. Lai ashiba agi, alima lisopur kaka ama asenoki asen shilem inyaktüsüla, ta ashiba den tzü mopung wazüka ayutsü atema lokti balalai jenjang balala agiba asoshi tenüngsang agütsü aser parnok dang maneni ozüsangnu, asemshiruru aser tsü mopung wazüka ayutsü atema meranga inyaktüsü ajungshi.

Nüngshilong sayaba sentong

Jenny K. Thong, BDO Tseminyu lenisüba kübo agi aser Sr. Pastor, SBC Rev. Gwasolo Semp-i bendang agüja sarasadem. Maneni lokti senden sentong Sendenyu Chipwen Union tir Er. Njilo Kemp lenisüba kübok agi aser SBC pastor Yhunyenlo Kent-i Tsüngrem temoatsü meshizüka sarasadem. Lokti pelaa agizükba o Sendenyu VC Chairman Hinilo Thong-i jembiba aser Charity Group, Sendenyu aser Parashen Cultural Troupe, New Sendenyu-i ken tajung tena telok ajungmeso. Maneni Thongsü VC Chairman Nyenlo Khing-i tepela o jembiba liasü.

Iba sentong nung Village Council Chairmen, VDB züngsemttem, lanur lenirtem, kaketshir lenirtem aser Sendenyu New, Thongsü-Sendenyu aser Lotsüphün yimtsüng nungi tetsür lenirtem dena liasü.

Commissioner & Secretary den külemi Director RD, Joint Secretary, RD, Mission Director NSRLM, Addl. Director RD, Joint Director RD, Deputy Director RD, Project Director, DRDA Kohima aser tanga ketdangsür aser staff temi iba sentong nung shilem agi.

SSA tesayur itasen majungkettsütettsü: Meghalaya sorkar



SSA tesayurtem longkak aitiba noksa nung angur. (File photo)

Shillong, Tsüklai/February 18 (Agencies): Meghalaya sorkari, state nung Sarva Siksha Abhiyan (SSA) tesayurtem indang itasen majungkettsütettsü, ta shiogo. Iba osang agütsüba mapang Meghalaya Education Minister Lakmen Rymbui-i, state nung SSA tesayurtem itasen ajungkettsütsüsa jenjang nung sorkar mali, ta ashi.

Temetettsükaji Meghalaya nung SSA tesayurtemi parnok itasen ajungkettsütsü khanga arudar aser parnok takhangba ataloktsütsü asoshi state sorkar nem February 18 nü latettsüogo. COVID-19 wara poktetba sülen Meghalaya sorkar tang rongsenketsüing nung timtem adoker aliba mapang ka lir, aser Chief Minister Conrad Sangma-

i, Centre dang par party NPP-i aniba sorkar rongsenketsüing nung timtem aliba nungi anitettsü atema central taxes nungi state shilem agütsütsü mepeshia asüingdangogo. February 9 nü SSA tesayurtemi parnok itasen ajungkettsütsü khanga Meghalaya Education Minister Lakmen Rymbui nem tezüluba nung takhangba agütsü.

Clause 6 report mebenoktettsü: Himanta

Guwahati, Tsüklai/February 18 (Agenices): Assam nung BJP-i aniba sorkari ashiba agi, Clause 6 report benoka minyaktettsü, kechiyong High-Power Committee-i benokba ya temzüing ozüing nungi talangka pilar. Iba olen ya Assam Minister Himanta Biswa Sarma-i lemsatepa liasü. "Clause 6 panel-i benokba onüktem ya Supreme Court-i obendang agütsüba aser Constitution kübok provisions aika den meputeper. Supreme Court-i ngutetba den meputepba onük onoki benoka minyaktettsü," ta Himanta Biswa Sarma-i ashi.

"Committee benokba onüktem ya onok den khenyongi meputep. Kodaser onoki iba ya benoka inyaksü?" ta Sarma-i ashi. Clause 6 report benoktsüba dak sendakba nung tang mezüingbuba Assam sorkari parnok tebilemba lemsatepogo. Temetettsükaji Assam nung BJP-i aniba sorkar aser Centre-i, parnoki Clause 6 report benokba ojang ka danga mezütoki benoka inyaksangshitsü, ta shiogo. Ajisüaka tang Assam nung BJP sorkari Clause 6 report benoktsüba dak sendakba nung parnok tenangzükbba khenyongi

melenshiogo. Assam sorkari Clause 6 report benoktsü nongnangba sülen nisung aikati high-power committee tentetba asadangdar aser Assam nung Citizenship Amendment Act (CAA) anema longkak aita nokdakba anendaktsütsü atema Central aser State sorkar tenangzükbba lepareprangshidar. Assam Accord Clause 6 kübok Assam lisopurtem, maittsü, oshi aser sobaliba kümzüka aser wazüka ayutsü aser ajungkettsü atema Constitutional, legislative aser administrative tekümzükbba agütsütsü shia lir.

Northeast tesem ya East-Asia hub ka asütsü: Modi

Guwahati, Tsüklai/February 18 (Agencies): Ato Kilonser Narendra Modi-i Brehostibarnü, connectivity projects balala amenokba sülen Assam aser Northeast tesem ya East-Asia hub ka akümtsü, ta ashi. Paisa, Assam aser Northeast tesem yagi "Aatmnirbhar Bharat" sentong tali tashi taitba kümdaktsütsü, ta ashi. Assam nung Majuli apu yanglutsü atema videoconferencing ajanga Bhumi Pujan sentong agiba mapang Modi-i iba olen lemsatepa liasü.

Pai ashiba agi, item project tem ya taoba mapang dang nungi tedangshiba, temulunglemtsü taketba asütsü aser iba ajanga mapang kümzüktsü aser maneni terenloktem ajanga tourism atsülangshia rongsenketsüing ajungkettsü. Ato Kilonser-i ashiba agi, Northeast tesem terenlok ya taoba Ato Kilonser Atal Bihari Vajpayee-i yimsü asüba mapang nungi tenzüik aser tang BJP sorkari tali temulung agüja inyaka tejakleni odar. Modi-i, northeast aser

South-east Asian linüktem sendakteptsü atema tzü lenmang ajanga shilem tongtibang agitsü, ta ashi. Union Road Transport and Highways Minister Nitin Gadkari-i, sen crore 15,000 alang project tasentem benoka inyakba ajanga Assam aser northeast state tem nung rongsenketsüing aser connectivity tsütsü temelenshi aika bener arutsü, ta ashi. Gadkari-isa, iba ajanga Bangladesh aser Bhutan den tzü ajanga tesendaktepba tajungba akümtsü ta ashi.

Tetsür kaketshir 1,500 nem mamatzü 200 ml agütsütsü: Sikkim CM

Gangtok, February 18 (Agencies): Sikkim nung tetsür kaketshir 1,500 shi kati anogoshia mamatzü 200 ml angutsü. Iba atema taoba hopta Chief Minister P.S. Tamang-i "Free Gift Milk to Girl Students of Sikkim" tenzüktsüogo.

Lanurtem achiajem shitak masüba aser temang nung tanga timtemtem samatsütsü atema iba mapa ya tenzüker, ta Chief Minister Tamang-i ashi. Sorkari iba alizüing atongtsü atema dairy farmers nem mamatzü litre ka nung Rs 8

teyari agütsür aser ano Sikkim nung aluyimba wadang asoshi standard price aser tanga tajangzüktem agütsür, ta paisa metetdaktsü. CM PS Tamang-isa lanurtem dang aluyimba nung temolung agütsütsü ayongzüik.

Sonowal-i Assam nung syndicates achaayangdar: Baghel

Guwahati, Tsüklai/February 18 (Agencies): Assembly Elections matong tsüingda Assam nung Congress-i state nung BJP-i aniba sorkar tali aitsü tenzükogo.

Chhattisgarh Chief Minister Bhupesh Baghel, shiba Assam nung congress party nüboyimba sentong achaayangba den nüboyimba sentong nung shilem agidar pai, Assam Chief Minister Sarbananda Sonowal aitsü. Chhattisgarh Chief Minister Bhupesh Baghel-i, Assam Chief Minister Sarbananda Sonowal-i state nung syndicate ka achaayangdar, ta ashi.

Baghel-isa, Sonowal-i sorkar masü saka syndicate nem temulung tali agütsü, ta shia pai aitsü.

Baghel-i ashiba agi, Assam nung nashi jang shibelenba ya state sorka tekümzükbba kübok inyaksangshir.

"BJP puri linük ajunga nung nashi tenüing nung vote meshir. Ajisüaka Assam nung parnoki achaayanga Bangladesh den ozüing alema nashi jang shibelener. Sonowal-i aniba sorkari syndicate ka achaayangdar," ta Bhupesh Baghel-i ashi.

"Assam nung BJP-i 2016 küm sorkar kümtetba sülen Bangladesh nung nashishi achiba tali küma shilem 211

jungogo aser iba ya kidanger linük nungi nashi jang tanenmakai belenba ajanga lir," ta Baghel-i ashi.

Ozüing alema nashi jang shibelenba aitsüba den Chhattisgarh Chief Minister Bhupesh Baghel-isa, ozüing alema nagmati shishilembatsü atema Assam BJP sorkari syndicates ka achaayangdar ta shia sorkar aitsü.

"Syndicate ya nashi jang shibelenba kija atema masü, saka Sonowal sorkari nagmati shishilembaba nung tsüingdai aiba aser ozüing alema nagmati shilemba dak sendakba nung record ajak ajatetogo. Anogoshia ozüing alema nagmati load 500 shi belener," ta Baghel-i ashi.

Chhattisgarh Chief Minister-isa, state nung mapa mangur tali akümba atema sorkar aitsü.

"BJP-i mapang crore 2 asoshi lenmang lapoktsütsü nangzüik saka 2016 nung 2020 tashi nung unemployment lakh 5 dak tali kümogo aser COVID-19 wara mapang tensa tamajungba kümogo," ta Baghel-i ashi.

Maneni Bhupesh Baghel-i, Assam kümzüktsü atema Assam nung Sarbananda Sonowal-i aniba BJP sorkar toktsütsü mapang tongogo, ta ashi.



Guwahati, February 18: New Delhi nungi Guwahati aruba train ka Bodhbarnü Rangia nung longkak aitertemi sota ayu. Longkak aitertem ya COVID-19 wara mapang yakbang nung inyaktertem liasü. Longkak aitertemi COVID-19 workers tem sorkar mapa nung anioktsü khanga liasü.

Ganja shibelener den tesendaktep aliba tetsür police ka apu

Agartala, Tsüklai/February 18 (Agencies): Tripura kübok West Agartala police parnok rongnung tetsür police ka puogo, shiba Ganja shibelenertem den tesendaktep liasü.

Tetsür police ya Gayatri Das ta jangjaogo aser la Agartla nung lar kidang nungi Bodhbar aonung apu.

Gayatri Das ya Tripura Police nung head constable ka lir aser la Ganja shibelenertem den sendaktepa aliba puteta February 15 nü mapa nungi anentsür liasü.

Gayatri Das aser temesepba mozü shibelener Prashanta Chakraborty na tsüingda telephone ajanga jembishinütepba

social media nung prokshiba sülen West Tripura SP-i la mapa nungi anentsü.

Tena iba tesem nung Ganja shishilembatsüba indang sensaksema liasü.

Tang tashi nung Ganja shibelenertem den tesendaktepa aliba ajanga Gayatri Das densema police 88 mapa nungi anentsüogo mesera puogo.

"Gayatri Das ya Tripura police headquarter nung mapang talangka inyaka liasü. Anungji la lenla aika nung tongtibang nisungtem den metettepa aküm," ta police sources kati ashi.

Kasa mapang nung Prashanta Chakraborty tang tashi mongui lir.



TIR YIMYIM

YIMOBILEM (EDITORIAL)

DIMAPUR ROGONÜ, TSÜKLAI (FEBRUARY) 19, 2021

GI NUNG ZÜNGOKTSÜLA

Kong nungi (?) ta asüngdangba ya nisungtem oli aruli jajaba mapang metetnúa asüngdangba dang masü saka chiyongsü, süoshi aser osettsüsettema kong yanglur ? Kong züsenteter aser kong nungi adoker, item tesemtemji metetdaksütsü kanga tongtumbang kümogo. Aji oda, tabentsü sü asütsüa akok mesüra chiyongsü tapu ka züsentetba mesüra nüngdak oset ka yanglutetba asütsüa akok, item adokdak aser yangludak tesemji kodang alima nem metetdaksüdir, iba jagi tesemjia nüngtugu akümer aser kasa chiyongsü aser osettsüset süaka ajung majungji tesem jagi bendangadoker. Iba yongji tanü alima nung World Trade Organisation kübok aliba linük ajaki pei pei lima nung adokba aser yanglutetbatem ajak Geographical Indication (GI) inyakyim nung zülüodaksür . Iba jagiang asenoki Darjeeling Tea, Naga Mircha, Mysore silk aser Nagpur oranges ta tetshir, kechiyong kasa süngo, mersü, silk aser naring süaka, item tesemtem nung jagi adokbatemji tangar dang nung kenyongi balaka tajungba asür. Aji oda, kodang item tesemtem tenüngji tetshidir, jet ta item tesemtem nungi adokbatemji temulungi arur. Atangji, nisungtemi yanglutetba oset shia tenüng den ano pei pei tamaisü Trademark lir. Ajisüaka, Trademark o GI na ya balala, kechiyong Trademark ajanga teyanglur tenüng metetter saka GI ajangabo tesem tenüng metetter. Aji oda, asen lima nunga, tatishitsü agi, tsüngkoteptsü ya GI nung züngok nung, sü ya shibai atak ta masü saka kong ataker ta asübjiang nüngdaksü, anungji Ao lima mesüra Mokochung district ta zülüoktsüa akok. Aji oda, tatishitsü agi aluyimba tsütsüa Aliba züngi, Longkhum bengana, Longsa mersü , Süngratsü nüoshi. Longjang mongmong ta GI nung zülüodaksütsüa akok aser abensüoshi tsütsüa yamaji Changki sü, Akhoya sü ta aluyimer aser südaker tenüngtemji masü saka parnok adokdak aser yangludak tesemjiang shisanga zülüoktsü. Tang tashi nung, India nung adokba, züsentetba aser yanglutetbatem ajak agi 370 dak tali GI nung tenüng zülüoka lir. Item rongnung tongtumbangtemji Darjeeling Tea, West Bengal nung Nakshi Kantha embroidery, Madhubani paintings, Bhagalpur Zardalu Mangoes, Bihar; Kutch Shawls & embroidery, Gujarat; Makarana marble, Rajasthan, Nagpur Oranges, Mysore Silk, Meerut Scissors ama chiyongsü, süoshi aser osettem lir. Kasaji Northeast nungia Arunachal Orange, Tezpur litchi (Assam), Large Cardamom (Sikkim), Naga Mircha (Nagaland), Chak-Hao (jang tanak) Manipur; Tripura Pineapples ama chiyongsütem kar GI ngua lir. GI nung register asüba agi senotsü teyari angutsü ta masü saka asenoki züsentetba, yanglutetba aser adokdaksüba oset, chiyongsü aser abensüoshitem madak kibur mekaa ayur aser item adokdak aser yangludak tesem jagi raliwalirtem puadaksür. Aji oda, kodang asen alidak adokba aser yanglutetbatem GI nung zülüoker, itemji kodang internet ajanga alima sünga prokshidir, itemji alimai meteta akümer aser asenok meyang chiyongsü, süoshi aser osettemji tayokdak tesem tuluba aser tajungba angur. Iba jagi ano asensasa asen khureta bendenloker, kechiyong kodang ozü lima nung ya adoker aser yanglur ta alima nem metetdaksüdir, ibaji tangaria hau, junger ta ashitsüsa asenoki anepalua inyaktetsüla. Atangji, GI khen agütsübaji tatembang masü saka küm ter shia reprangdangtsü aser junger ta asütsüsa inyaka melira GI magütsütsüsa akümtsü. Asenoki aiben chiyongsü tapu balala züsentetaka aser osettsüset tapu balala yanglutetaka tayokdak maka takoksa anguba agi tezüdanger meinyaker. Ajisüaka, tanü putu nungbo asenoki dang züsentetra aser yanglutetra, itemji ayoktsü atema tayokdak online ajanga melamelaa angur aser kodang aseni züsentetba aser yanglutetbatemji GI nung züngokdir, tangar alima talang nungi alu aser mapa inyakdak tonga tereprangi arutsü aser shishilembatsü lenmang lapoktsü. Joko, asen lima nung süngmok shidoka meindoktsüsa lemsar akongba machine Dimapur nung amenokogo aser Bengana-a shidoka meindoki chiyongsü yanglutsü tenzükdagi. Iba amaji tanem tanemi asenoka GI inyakyim indang meteta akümba den külemi asen lima nung asenoksasa nüngdakba mapatem reprangteta tenzükdagi. Iba amai lanurtemi temulung agüja peisasa meranga inyak nungbo, atangji, 2030 küm nungibo asen lima nungia chiyongsü aser osettsüset aika bendangleni yoktettsü. Tanü lanurtemibo GI inyakyimji internet nung bushia inyaktettsü saka ano Industries & Commerce department den asüngdangtepa inyakra, parnokia yaritettsü.

OLEMSABANG

KECHIBA ALIMA NUNG KHRISTAN MERENLOKER?

~ S.Nuken lkr, Naga United Dimapur

Shibai Tsüngrem o amangdir alima nung tetsübuttsü kecha mali!! tanü alima ajunga nung khristantem mainer ta jembiba ya kechi ati!! Kecha tai mali, Tsüngrem O ataloker asütsü!! Iba ya ken shisadangdi!! Chiongtsü kar nung temenen kar aliasü ta bilemer, Tsüngrem o nung shai lir. Chiyongtsüdak shisatsü mali, anungji oset ajakji temerük asütsü!! kechi agi alima menentsür?? Ibaji mangatetdang aseni amangba ajanga teraksa jendi ajurur asütsü?? Tsüngrem o züngdangang kechi zülua lir?? tanü putu khristantem taküm aikati bendanga amshiba ajanga shia aruogo?? Kechisa ajuru!! Nuktapangta aser yi jemer kidangi aotsü arendaka bilemba sayutsüngirtem aika liasü!! tanü iba yimti nung yi jema senzürtem aika missionarytem ama nenoki ajurutsü!! Kechiaser parnok sensaker aser timtemer taküm, kipongtem aika yariba ajurutsü!! Temeim mapa tulu inyakba ajurogo!! Sak akhristan tajung aikati yamaji meinyaktet?? Tanü khristantem atenshidak maparen ajak nung takar aser tulurtembo tamalen aser tilar aser senskaerbo tite tesülen dang amentsü ya melenshira kodanga khristanji alima nung maintsü amai bilemer mesüra maintsü südi!! ya jung junga shisadangang. Yisui ashi, nenok rongnung shiba tuluba? Anungji M. Gandhi ashibaji shidak khristan yimsü ya junger?? Saka ka lir ta Gandhi ashiba bilemteter!! Khristan mapa aser yimya majungba khristanji takar aser tulurtemi sayu?? Anungji khristan kümdanga jajang lendong anasa lir!! alima nung khristantem rishikangshitsü shia lir?? anungji shina yutsüba mapa ataloka aruba ajanga Tsüngrem o ya ochi lir ta kulitem tejangja sayur? Iba yongji America nunger Dr. N. Armstrongi ita nung tetsüng ajemok aser jaja 1969?? Nai amangyonga mamangyonga ataloktsü aser ataloka arur?? Alima jangratemtsü ajak süitema wadoktsü saka Tsüngrem O teti alitsü!! Tsüngremi tzüim tulu aser alitakongtem tepur jung yanglua doktsüogo koda tesüngmangtsü?? Alima nung jangratemtsü tulutibaji Tsüngrem tenzükertem lir?? rongsenbo aika lir, chir mechima liaka taküm nung tetsübu agi dang sünger aliba takar tulur aika ajurua aruogo? RCC aika lir car zünger mezüngma amentepa lir! saka tepela makaba kipongtem ajuruogo!! Naga lima nung ki tajung aika senchi mangutsütetba meyang par ki shipanga ayuba ajuruogo?? Khristan lima nung iba amala mapa tamajung aika inyakba ajangshiogo?? Khristan tajung künü anogo iba ama inyakba nai aser nür kipongi ajurutsü? Koma ajurutsü nür jala jabaso aser semchritemi iba senmang ajurutsü?? Tanü nai tajung kar inyaka lira ita ama, petinu ama nür jala jabaso iba kima nung merendaksütsü Tsüngrem o tamadok? Nür kipongi temeim mapa kar danga inyaka lira iba süngjang achitsü ta laishiba Tsüngrem o nung zülua mangu no?? Tsüngrem akümtsübur khristan tajung nü mapa kechi lir??

TEMESÜBA LENMANG

~ C. Lima Ozüküm, Mongsenyimti

Tewaloker maliba lenmang ka
Teroto lazünga alidang
Nüktzü jenzüka tsükba angashir
Angetdemer yimdong teyong nung
Nükbonükdanga tao-tashir mali

Nümdaka toktsü süoki mai
Mesükshir telozür temangi
Tilo panglor ali ayim asüng
Kangjen- longjen sapua
Pora poji naklur dang.

Shiko indang merüa ao
Pa aküm sentsü magizük
Tiatsüsang amokanü
Külena ao sayip jaja
Menen nokia metipolu.

Kirepchirep aji madong
Matak kodak tenji manen
Pokya ao süngzük mangu
Temong maka libaliro
Walokangma temesüba lenmang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Vatican-i Iraq dang Pope Francis nem security agüjang ta mepishi



February 26, 2020 nü Vatican City nung Pope Francis-i Iraq nungi Khristantem den tangokba noksa nung angur.

February 18, 2021: Bodhbarnü (February 17, 2021) Iraq Foreign Ministry nung Undersecretary, Nizar Al-Khair Al-Sayed-i, Vatican-i Iraq ketdangsertem dang taruba ita Pope Francis-i Iraq semdangba mapang nung pa nem security agütsüdaktsüner mepishiogo, ta metetdaktsü.

Paisa, pai Iraq nunger tayimtsü nung ang aruner, ta metetdaktsü.

Al-Khair Al-Sayed-i, "Pope-i semdangbaji ajanga Iraq nung temelenshi alitsü aser Khristantem pusemstsü. Pope-i Dhi Qar province kübok ainkar Abraham asoba tesem-akhidang yimti Ur nung onük jembitsü," ta metetdaktsü.

Pope-i Shia putir, Ali Al-Sistani den senden amentsü, ajisüaka tezüngzüktep kecha magitsü, ta ketdangserisa

metetdaktsü.

Pope Francis-i March 5 nü Iraq semdangtsü. Pai iba linük semdangtsü atema jelia sentong yanglur, ajisüaka Islamic State kiralongrartemi pai semdangba mapang nung timtem agütsü nungbo ta shisabulua Iraq ketdangsertem dang pa atema security meshir.

Iraq nung küm aika rara liasü saka Pope-i Iraq semdangba ajanga loktiliba nung tarak keta aliba aneptsü, ta teimla nung 2019 küm Iraq-i Pope Francis dang linük semdangtsü asüngdanga liasü.


March 5, 2021 nikongdang Pope, Baghdad tonga aotsü aser pai Iraq Tir, Barham Salih ajuruba sülen linük yimtiba nung aliba Syrian Catholic Cathedral of Our Lady of Salvation nung Arogo lenirtem ajurutsü. March 6, 2021 nü pa

Najaf-i aotsü aser linük nung Shia lenir, Grand Ayatollah Ali al-Sistani ajuruba sülen Ur nung tamangba lokti balala senden nung adentsü atema Nassiriya-i aotsü. Pa maneni Baghdad-i aruba sülen Chaldean Cathedral of St Joseph Tenla kidang tekülem sentong nung adentsü.

March 7, 2021 nü Pope-i northern Iraq semdangtsü, tongbang nung asürtem bilemteta Mosul nung pai sarasademtsü aser helicopter ajanga Qaraqosh-i aotsü. Yangji pai Immaculate Conception Arogo nung Khristantem ajurutsü.

Iraq nung Kurdish region kübok Erbil nung aliba sports stadium ka nung pa tekülem sentong ka nung adentsü. Iba sülen March 8 nü pa Rome-i meyipa aotsü.

March 27 nü Discovery+ nung Khristan film 'Resurrection' sayatsü



February 18, 2021: Discovery+-i Khristan film "Resurrection" sayutsü atema renemdar; iba film ya "The Bible" Producers Roma Downey aser Mark Burnett nati produce asü.

MGM & LightWorkers indang production-i iba film ya March 27 nü sayatsü.

"Resurrection" film ya mini-series "The Bible" sülen tangokba film lir, aser iba film nung Yisu Khrista Kangki nung asüba sülen Yisu sülen anidakertem bushiba, parnok lenir maliba aser parnok ratamataba indang sayar, ajisüaka Yisu Khrista tasü nungi shia aruba sülenbo Yisu

sülen anidakertemi parnok teimlaji Kangki nung metembang saka parnok den teti lir ta angateter.

"Tamangertemi pei tamang jenjang aintsüsa yangluba film tem reprangner, aser iba film ajanga tamangertem tzüra-atemtsü," ta Downey aser Burnett nati sangdong ka ajanga metetdaktsü.

"David Zaslav aser par team-i kibong züngsemtem külemi reprangtetsüsa film tajung yangluogo," ta kasa sangdong nung shia lir.

"Onoki teimla aliba otsü 'Resurrection' film lemsateptsü atema yongyar

aser Easter season mapang nung iba otsü kibongtem den lemsateptsüsa maongka anguba atema pelar," ta sangdong nung shia lir.

Film tasenba ya ajanga Yisu Khrista tasü nungi shia aruba otsü ashir.

Discovery, Inc Tir aser CEO, David Zaslav-i, "Discovery+ nung Resurrection sayatsü aliba atema onok pelar, aser otsü shia arubatem rongnung iba otsü ya tongtibangtiba asütsü. Iba ama film ka nung Mark aser Roma den partner asüba atema onok pelar," ta metetdaktsü.

Downey aser Burnett nati "The Bible," mini-series ajanga Emmy nominations asem ngua liasü aser History nung 100 million viewers tongteta liasü. 2014 küm nunga tena indang "Son of God" film ajanga takok junga nguteta liasü. Tena indang mini-series, "A.D. The Bible Continues" ajanga-a maneni takok angu aser tang tesüsa "Resurrection" film sayatsü.

ANOGO ABEN TSÜNGREM DEN

LAISHIBA ARTSÜ (YIHUDA 17-25)

"Ne O kü tsüng asoshi milen aser kü lenmang asoshi tesangwa lir." (T. Ken 119:115)

Tsüngremi tangatetba agütsüba rongnung mezüngbubaji Tsüngrem O lir.

Pentecost Anogo nung Tanela Temeshi alubaji Yihuda nunger otsü nung matalokdangba atalokba otsü liasü. Temaba Taktang nung atalokba angartem süngmanga liasü. "Ibai koda (?)" ta parnok rongnung asüngdangtep. "Ya kechi tetezü?" (T.M. 2:8,12). Tenyar Peteri iba indang ratetta ashi, "Saka iba indang Yoel ainkar agi ya jembiogo" (t.16). Iba anogo kechi atalok iba tatembangba tashiji zülua akaba Laishibaji lir. Tatalokbaji dang masü saka tenyartemi parnok sermon nung aser taküm kuli nung ibaji amshi (2 Kor. 4:13; 1 Kor. 1:31; Rom 12:19; 14:10-11; 15:2-3).

Tenyartemi aser tamangertemi iba nungi kechi angazükdaktsüner ajiang: "Adianutem, kechi zülua ali iba dak alema mebenshitsü onok dak angazüksü, aser tesayur kati ka anema mezümeküm masütsü..." (1 Kor. 4:6). Item tongtipang ozüngtem tenyartemi kong nungi angazük? Tejangja Khrista parnok kibur nungi shibai Tebui Tanela masadangi dang agütsü, "Ya zülua lir" ta latetta aliba kübok mapa inyak. Kari paji mezüja shimtetba asünung pai zülua akaba Laishiba atena oa inyaksü akok ta bilemra aji tesüngmangtsü ka asütsü. Temeimba talila Laishiba aser jungkai adokba bener marutsü kümdangang! Sayutsüngir kari Yohan 20:30ji ain jungkai adokba ta jembir. Parnoki "Yisui iba kaket nung zülua maliba sayatenya aika inyak" ta ashiba O nung atsükoker parnok metentsü meranger. Saka item temeten O jembirtemi Yohani iba tekong sülen kechi zülü ibaji merepranger: "Saka Yisui Khrista, Tsüngrem Chir, ta nenoki amangtsü asoshi, O itemi zülur (t.31). O ka nung asenok taküm Khrista nung taküm alitsü asoshi zülua aliba O dak alema tanga tongtipang kecha mali. Kechisa zülua lir aji teperi! Lairen meyipa nung tongtipang tetuyuba kaji "Mokurai O telangtep!" Laishiba kong anener idakji anenang! "Akhi artsü teindok" (A. Shin 22:28).

Shi nisungi teti tamaren nung janrar saka Yisu "Yashi, tanü aser teti kasa dang." Anungji tesayuba balala aser memetetba tesayuba... (Ibri 13:8-9).

Shingaia Laishibaji mesentoktet; asenok küm den kaketji tesatemba aser tarokba akümer (C.H. Spurgeon, 1834-1892).

Oba, Ne O tem angateta meimtsü tangatetba shisatsü kü nem moajang. Amen.

Osangtajung kentener Carman süogo

February 18, 2021: GMA Gospel Music Hall of Fame züngsem aser Khrista osangtajung kentener, Carman Dominic Licciardello Mongolbarnü (February 16, 2021) Las Vegas, Nevada nung aliba hospital ka nung süogo; pa arrshi küm 65 liasü.

February 16 nü sangdong ka ajanga, "Pa tebok nung timtem adoka surgey agiba sülen timtem balala adoka mapang talangka temang mejungi aliba sülen alima nungi pilaogo," ta metetdakja liasü. Pa cancer tashidak nungi anepba sülen tesüiba küm trok tashi lir tawa pa surgery agiba ajanga telung nung azü yimdok.

Taoba ita Carman indang representative kati social media nung Carman indang followers million tesadang shia dang pa atema sarasademjang ta mepishia liasü.

January 25, 2021 nü Carman indang Facebook page post ka ajanga, "Onoki tang na nüngdaker aser sarasademdaktsüner! Taoba ita Carman surgery agia liasü. Ajisüaka pa temang majung aser temperature maneni timba dang akümer. Ibaji telung nung azü ayimba ajanga lir ta parnoki meteta yasüng-a ano surgery ka agiogo," ta lemsatepa liasü.

"Pa tezüngjang aser temesen nati mapa junga meinyaker. Tang pai Tsüngrem teyari nüngdaker. Carman taneptsü

angutsü atema yimlibilema sarasademjang," ta post nung lemsatepa lir.


Carman ya 1956 küm January 19 nü New Jersey kübok Trenton nung aso aser pa arrshi küm 15 asüba mapang nungi kentenba nung temelung agüja liasü.

Stadium nung nisung timtiba adenshia tekülem ken aniba world record pai yangluteta liasü. Khristan kenten sentong tulutibaji Texas Stadium nung agi aser iba sentong nungji nisung 71,000 dak tema aden. Iba sülen Chattanooga, Tennessee nunga pa indang kenten sentong nung nisung 80,000 dak tema dena liasü.

Akümlü nung pai inyaktetba tulutibaji nisung miilion aika tanela Khrista dangi anir aruba ya lir, ta Carman-i aiben jembia aru.

1985 küm pai indang mezüngbuba ken "The Champion" kanga nüngtugu aküm; pai award aika angu aser item rongnung House of Hope of Humanitarian Award, Billboard's "Contemporary Christian Artist of the Year" (1992, 1993 aser 1995) densema lir. 2018 küm pa Gospel Music Association Hall of Fame nung züngoka liasü.

Pai mapang talangka kibong mekümi dang aliba sülen 2017 küm December ita nung Dana den kibong küma liasü.

OLONG PAITEP # 5729**TIPIEN**

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

2. Hai sür inyok
3. Aor tenüing ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 5728 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar, 6. Belem,
9. Süjak, 10. Aonung, 11. Dokan,
13. Tinu.

**ALOKBA ASER PRIME MINISTERBA NA- 5**

- Alok** - Prime ministerba, ni Alokba nü den ken ajuruteptsü arua ya!?
- PM** - Alokba na kechi atema aru rasaa shiangjong.
- Alok** - Prime ministerba, ni küm 20 tema pastor inyaker ka, city aser town nung dang lidangnüaka meliteter anungji kü mapaji doktsür nür party nung president ka ama inyaknüa nü den jimbiteptsü aru!!
- PM** - Alokba, tanü asüng yimtaklirtemang facilities peria angur aser ni sen jenti yoker nung koda ser yimtak meliner??
- Alok** - Prime ministerba, nai agütsübatemji nibo ka danga tenüklak agia mongudang!!
- PM** - Alok aji koda ser?! Ni yokba sanction order tem ya reprangang.

(Maneni asüng adok nung...)

TANÜBO NAI LANGZÜANG

Q. 'The Insurance Regulatory and Development Authority of India' indang headquarter kong lir?

- A. Telangana B. Andhra Pradesh
C. Tamil Nadu D. Mumbai

===== (Taruba adok nung onoki langzütsü)

YASHI ADOK TELANGZÜBA : 86th

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?**INDIA NUNG ONLINE SHOPPING SITE TAJUNG KAR: FEBRUARY 2021**

- | | | |
|----------------|----------------------|-------------------|
| 1. Amazon | 14. Goibibo | 27. Mamaearth |
| 2. Flipkart | 15. Zomato | 28. FabIndia |
| 3. BookMyShow | 16. 1mg | 29. Himalaya |
| 4. Myntra | 17. The Souled Store | 30. Udemmy |
| 5. Ajio | 18. Pepperfry | 31. Dineout |
| 6. Pharmeasy | 19. Decathlon | 32. Shopclues |
| 7. Snapdeal | 20. Redbus | 33. Beardo |
| 8. BigBasket | 21. Medlife | 34. Testbook |
| 9. Nykaa | 22. Firstcry | 35. H&M |
| 10. Paytm Mall | 23. 2Gud | 36. TheManCompany |
| 11. TATA CLiQ | 24. UrbanClap | 37. Crocs |
| 12. Swiggy | 25. Nature's Basket | 38. Dominos |
| 13. MakeMyTrip | 26. Grofers | 39. Lenovo |
| | | 40. Indiamart |

SUDOKU # 5771

6	3	1							1	9	8	7	4	2	5	3	6
7		9	5		1			3	7	3	5	6	9	8	1	4	2
2	4		8		9		7	1	2	6	4	1	3	5	8	7	9
5	2			9	3	7			8	4	1	5	2	7	6	9	3
	6						8	5	9	2	3	4	6	1	7	5	8
	7				5	2	4	9	5	7	6	3	8	9	2	1	4
		7		1		9	6	4	4	8	7	2	1	3	9	6	5
4		2		5	6	8			3	1	2	9	5	6	4	8	7
8		6			7				6	5	9	8	7	4	3	2	1

TELANGZÜBA # 5770**OJANG LUTEP # 5317**

- LOTEK :
- NGNU :
- MNÜAGII :
- JEKBNDOA :
- IRLENI :
- ÜTSNÜNG :
- BATIM :
- AYENONGDER :
- KTLOI :
- NGLYAU :

OJANG LUTEP TELANGZÜBA # 5316

TARUTSÜ ANOGOTEM ATEMA MEBILEMDANGI JEMBIA INYAKRA
ARUYA ALIBA ANOGOTEMJI TEBILEMTSÜ

TAN HOPTA ATEMA - KOMA SÜLA ?

Q. 1963 küm 1st Decembar sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



February 18, 2021 nü Amritsar nung aluyimer union balala nungi züngsemtemi train lenmang mokdang aluyimba ozüngtem agienang ta takhangba agüja longkak aitba noksa nung angur.

Punjab aser Haryana nung aluyimertemi train lenmang mokdang

New Delhi, February 18 (Agencies): Centre sorkari benokba aluyimba ozüng tasen asem anema Brihostibarnü Punjab aser Haryana na nung aluyimertemi tesem aika nung train lenmang mokdang longkak aitogo.

Aluyimertem union balalai akümbe tentet- Samyukta Kisan Morcha (SKM)-i ayongzüka linük tesem ajaklen train lenmang mokdangsü, ta taoba hopta sangdonga liasü. “Brihostibarnü aluyimertemi anüngdang 12:00 ako nungi nikongdang 4:00 ako tashi train lenmang mokdang longkak ait.

Punjab nung longkak aiteremi Delhi-Ludhiana-Amritsar railway lenmang tesem aika nung mener longkak ait. Aluyimertemi Jalandhar

nung Jalandhar Cantt-Jammu railway lenmang aser Mohali district nunga train lenmang ka mokdanga liasü.

Haryana nunga tetsürtem densema aluyimertemi Ambala, Kurukshetra, Panipat aser Panchkula district tem nung train lenmang mokdanga liasü. “Osangbener den jembidang Ambala nungi Bharatiya Kisan Union (BKU) lenir, Gulab Singh-i,

Aluyimba ozüngtem magien tashi onoki tesünep nung longkak aittsü,” ta metetdaksü. “Haryana aser Punjab naprongla nung government railway police aser state police-i security akangshia liasü, ta ketdangsertemi metetdaksü.

Divisional Railway Manager, Ambala Division, G

M Singh-i, aluyimertemi 'rail roko' sentong ayongzüka onoki train service manen, ajisüaka station balala nung mapang talanglang anenzüka senzü, ta metetdaksü. “Bharti Kisan Union (Ekta Ugrahan) züngsemtemia Punjab nung Nabha, Mansa, Barnala, Bathinda, Ferozepur, Jalandhar aser Tarn Taran densema tesem 22 nung train lenmang mokdanga liasü.

Centre sorkari benokba aluyimba ozüng tasen asemji Farmers' Produce Trade and Commerce (Promotion and Facilitation) Act, 2020; Farmers' (Empowerment and Protection) Agreement on Price Assurance and Farm Services Act, 2020; aser Essential Commodities (Amendment) Act, 2020 lir.

Nepal nung petrol/diesel alizüker shibelen India nung yokteper

Patna, February 18 (Agencies): India nung petrol aser diesel jenjang kanga atuba sülen India nunger aikati kidanger linük, Nepal nungi totzü alizüka bener arua yokteper, ta osang ka ajanga metetdaksü.

Nepal linük nungbo petrol aser diesel totzü jenjang kanga dalang, ibayongji linük ana arrtsülen alirtemi Nepal nung totzü alizüker India nung ayoker.

Bihar kübok Araria aser Kishanganj na nung alirtemi arrtsü adena orr Nepal nung totzü alizüker aser bener arua

state nung sen tur ayoker, ta kasa osang ajanga metetdaksü.

Totzü shibelen ayoker aika police aser SSB sepaitemi puogo. “Bihar kübok Araria nung petrol litre 1 nung sen 93.50 lir, saka Nepal nungbo petrol litre ka nung sen 70.62 agi dang alir.

Nepal nungi totzü shibelen ayokba osang jangjaba sülen Bihar police aser Sahastra Seema Bal (SSB) sepaitemi totzü shibelenertem mita reprangdar. “Iba denji külemi Nepal Police-ia totzü tanker ka nung diesel bener India-i aoba

mapang nung nisung asem puogo.

Brihostibarnü India linük nung petrol litre shia nung poisa 34 aser diesel litre shia nung poisa 32 tuogo. India kübok yimti aika nung petrol sen 100 jungnüa tudar.

VAT ama local tax aser khu abenba charges nung ajemdaker state shia nung totzü jenjang balala. Linük nung petrol nung value-added tax (VAT) saru timbatiji agibaji Rajasthan lir, iba sülen tanabuba state ji Madhya Pradesh lir.

Rajasthan nung petrol litre ka nung sen 100 dak tema kümogo

Jaipur (Rajasthan), February 18 (Agencies): Rajasthan nungbo tang mezüng Sriganganagar district nung non-premium petrol litre ka nung sen 100 dak tema kümogo aser diesel litre ka nung sen 92.12 kümogo.

Tawa state sorkari VAT saru shilem 2 ajemogo, ajisüaka totzü jenjang kanga atuba agi nüburtem kanga timtemdar. Tang state Assembly senden nunga totzü jenjang kanga atuba onük nung o lemtepdar. Iba onük nung o lemtepdar mapang nung Chief Minister, Ashok Gehlot-i, totzü jenjang kanga atuba ya Centre sorkari asalentong tai benokba agi lir, ta tai tongloksü.

Gehlot-i Assembly nung, state temi totzü jenjang ajemtsüsa Centre-i kecha anünga meyutsü, ta metetdakja liasü. Union sorkari excise duty ajemogo, tamalenbo ibaji state tem den lemsatepa liasü. Diesel excise duty sen 8 aliba nungi 1 ajem aser ibaji ajanga state tem nem shilem tajemba agütsü.

Ibayongji state temi tang totzü sarutem nung sen majemteter, kechiyong ibaji ajanga state saru nung kongshitsü,” ta Rajasthan CM-i metetdaksü. “State sorkar ketdangsertemi ashiba agi, petrol litre shia nung Central saruji sen 32.90 lir aser state saruji sen 26.52 lir. Diesel litre shia nung Central saruji sen 31.80 lir aser state saruji sen 19.62 lir.

Centre sorkar aija Gehlot-i, “Excise duty ya Central sorkar khuret lir. UPA yimsüsüba mapang nungbo totzü barrel ka nung US sen 135-140 tashi liasü (aika liasü). Ajisüaka iba mapang nungi petrol litre nung sen 70-75 agi dang ayok.

Ajisüaka tangbo petrol litre nung sen 90-100 kümogo. 2016 küm Basic excise duty sen 9.48 liasü aser sen 1.40 tashi ajem. Iba nungjagi shilemji state ajak nem agütsü. Ajisüaka special excise duty sen 6 aliba nungi sen 11 aküm. Iba sen nungjagibo state sorkar nem shilem magütsür,” ta metetdaksü.



Chennai, February 18, 2021: Brihostibarnü Chennai nung aliba Officers' Training Academy (OTA) nung Afghan National Army (ANA) nungi officer tem training agidang tangokba noksa nung angur. Parnok hopta pezü tashi training agitsü.

UP kübok Unnao district nung Dalit tsür ana tasümang angu

New Delhi/Lucknow, February 18 (Agencies): Bodhbarnü Uttar Pradesh kübok Unnao district nung alu ka nung Dalir tsür ana tasümang angu; Dalit tsür anaji ka arrshi küm 13 aser ka arrshi küm 16 liasü, ta police-i metetdaksü.

Tasümang ana denji arrshi küm 17 tetsür ka temang mejungi lia angu. “Nikongdong yimdaklirtemi tetsür chanu asemji alu nung angu, ajisüaka parnok kidangi meyipa maruba agi yimdaklirtemi bushi tenzüka liasü.

Yimdaklirtemi tetsür asem anguba osangji police nem metetdaksüba sülen par asempronglaji hospital-i anir ao, saka anabo süadoker liasü aser kaji Unnao nung aliba hospital kati anir ao, ta police-i metetdaksü.

Tetsür asemprongla teka aser tetsüng lisü agi alener liasü. “Superintendent of Police Anand Kulkarni-i, tetsür anabo

süadokogo aser ka hospital-i anir oa mongdar, ta metetdaksü. “Iba tatalokba nung ajemdaker UP sorkar aija Brihostibarnü Congress general secretary, Priyanka Gandhi Vadra-i, kechiba tetsürlar kinüngertemji soita ayur, ta asüngdangba den külemi tetsürla nem treatment tajungtiba agütsütsü atema Delhi-i anir aotsüla, ta takhangba agütsü.

Facebook post ka ajanga Priyanka Gandhi-i, “Unnao nung tatalokba ya temelung raksatsüsa lir. Bushisüngdangtsü aser ochi temeden agütsütsü atema lar kibong o angadangtsü aser tetsürla nem medical teyari agütsütsüji kanga tongtibang,” ta metetdaksü. “Lar kibong soita ayuba ajanga bushisüngdangba nung timtem agütsütsü. Lar kibong soita ayuba ajanga sorkari kechi tajangzük angutsü,” ta laisa asüngdang.



South 24 Pargana district (West Bengal) February 18, 2021: Brihostibarnü South 24 Pargana district nung election nüboyim sentong ka nung BJP lenirtemi Union Home Minister, Amit Shah nem narozük azüksüba noksa nung angur.



European Commission President Ursula von der Leyen (tiyong), European Commissioner for Health and Food Safety Stella Kyriakides (abelen) aser European Commissioner for the Internal Market Thierry Breton nungertem Brussels, Belgium nung February 17, 2021 nü osangbener senden ka nung adenba noksa nung angur. European Union ajanga COVID-19 tashidak puteta raratsü asoshi mozü tasen yanglutsü atema linük balala nungi ketdangsür aser lenirtem lungjemdaksür. Iba project tasenba dang ya "HERA Incubator" ta ajar aser yangji EU nung aliba research agirtem, biotech companies, manufacturers aser sorkar ketdangsürtem dena lir.

Myanmar nung mitkar anema longkak aitba manener

Naypyitaw, Tsüklai/February 18 (Agencies):

Mitkartemi tashiyim amshia February 1 nü sorkar atsüngdokba aser election ajanga shimtetba lenir, Aung San Suu Kyi apuba aija Brehostibarnüa Myanmar tesem ajungalen longkak aita liasü, aser police temi tashiyim amshia lokti arishi, linük yimtiba nung water cannon aser north tsütsü jila ka nungbo lijak amshia liasü.

Anogoshi longkak aitba ajanga sorkar office aika mapa meinyakteti kümogo aser mitkar yimsüsürtemi election tasen agitsü nangzüka sorkar mapa inyaktertem dang mapai meyipa aotsü ajungshiaka longkak aitba ajema aoba majiteter.

"Nisung ka kijai yimsü asüba nung ni mesakner. Onoki tanüngba arishi tetsübu nung meliner," ta Yangon nung longkak aiter Ko Soe Min-i ashi, kong nisung meyirijang aika yimtong nung longkak aita liasü.

Lokti tulutem Yangon indang central Sule Pagoda tesemi meyipa shilang aser lanur aika ano teti longkak aitba tesem, university campus anasa lemjem nung sendena liasü, aser police temi parnok meindoktsü merang.

Century tesadang ka tejakdang army temi yimsü asüba mapang azüdokshia longkak aitertem ajemreptsü merangba ama masü tang longkak aitba tera tesunepba lir, saka parnok den ano civil disobedience movement ajanga maparen aika nung tetsükdaksü ajurur.

Police aser army garitem nokdangtsü mechi gari raksaba ama sayur anogo ka lir mitkari sorkar atsüngdokba anema nokdakba sayua Yangon nung gari anirtemi gari kanga nüshia ania liasü.

Linük nung yimti tulutiba jenjang tanabuba nung aliba Mandalay yimti nung longkak

aitertemi sorkar atsüngdokba mapang apuba lenir ana chioktsü takhangba agütsü. Linük yimtiba, Naypyitaw nung police nokdaka aliba tesem tonga aruba telok ka aridoktsü mechi police temi water cannon amshia liasü.

North tsütsü Myitkyina jila nung police aser sepaitemi lijak amshia longkak aiter senshidaktsütsü merang, ta yangji alir kati ashi. Social media balala nung prokshiba noksa nunga sepai aser police indang gari tulutem anendena aliba nguogo.

"Parnoki constitution mesüra rule of law nung aliba ama meinyaker. Parnoki kiralongrar ama inyaker," ta activist Sut Seng Htoi-i ashi.

Civil disobedience movement tatem kati arudaktsütsü ya mitkar indang sorkar teinyaktsü tongtipang ka kumogo.

Sorkar mapa inyaktertem dang longkak aitba nung shilem agitsü ajungmesoba mechi mitkar yimsüsürtemi Bodhbarnü menur film director, actor aser kentener ka densema nungtugu nisung trok aputsü ozüing agütsü.

Mitkar indang 'wanted list' nung alir actor Lu Min-i pa indang Facebook page nung, "Asen nüburtem lungjemba ya kota tesüngmangtsü. Nübur indang tashi ya nüburnem sa meyipa agütsütsüla," ta zülutsü.

Mitkartemibo parnok inyakba mera nung nübur timba dena lir, ta ashir.

Sorkar atsüngdokba nisung apuba ajanga anüolen linüktemi kanga sashia aitsür aser United States aser Britain linüki tenokdangba agütsütsü amokmerenogo.

Tang tashi China-i mitkar anema ola adoka mali aser kidanger linük, Singapore aser Indonesia nati jembishinü akatsü ajungshir. Singapore-ia civilian

dak azüdokshi masütsü ajungshia lir.

"Tekka tazüing aliba civilian tem dak kecha tensa nunga injang mamshitsüla," ta Singapore foreign minister Vivian Balakrishnan-i ashi.

Police temi rubber bullets tembo amshia arur.

Taoba hopta Naypyitaw nung longkak aiter ka dak tekolak nung injang agi akhi aser la ya tang life support nung lir, aser doctor temi la takum kumzüktsü teimla mali, ta ashir.

Nüburtem ayipjanga mejangtsü atema sepaitemi security agütsür, ta mitkartemi par indang Facebook page nung metetdaksü.

November 8 election nung Suu Kyi'er National League for Democracy teloki takok anguba nung tim masüba mapa inyak ta mitkartemi aitsüba electoral commission-i magizükba sülen sorkar atsüngdokba liasü.

Mitkar lenirtemi election tasen ka agiba sülen tashi bendanga agütsütsü, ta nangzüka lir, saka tang tashi election agitsü anogo meshiteter aser nüburtemi yangji tamang makateter.

Sorkar atsüngdokba sülen Suu Kyi ya apu aser Natural Disaster Management Law nung aibelen aser ozüing alema bendanglen nungi walkie-talkie radio trok alia bener arua amshi, ta tai tonglokja lir. La okadak March 1 nü okdaksü lir.

Arishi küm 75 tain Suu Kyi ya linüki democracy bener arutsü merangba mechi kidang küm 15 tashi pua ayu aser la timtemba atema 1991 küm Nobel Peace Prize ngua liasü.

Sorkar atsüngdokba sülen Bodhbarnü tashinung nisung 495 puogo aser item rongnung nisung 460 bo tang tashi pua lir, ta Myanmar indang Assistance Association for Political Prisoners ajanga ashir.

Opposition lenir aputsü sentong yangluba mechi Georgia PM anen

Tbilisi, Tsüklai/February 18 (Agencies): Opposition lenir ka aputsü sentong yangluba mechi Georgia indang ato kilonser mapa nungi anen, koba ajanga yimtenren tsütsü tensa tamajungba akumtsü, ta pai ashir.

Opposition lenir Nika Melia ya ken o mejembidang pua ayutsü court kati telemtetba agiba ajanga asen nübur temang aser takum lendong nung yutsür, ta Giorgi Gakharia-i ashi.

2019 küm sorkar anema longkak aitba mapang Melia-i lokti tulu ayongzüka azüdokshia liasü, ta tai tongloksür.

Pai item taitüsü magizüker saka pai aitsüra küm teku tepuokdak ayutsü.

Ato kilonseri pa menden nungi alur ta Brehostibarnep sangdongba sülen Melia aputsü sentong khi atema thinena atar, ta Georgia indang Interior Ministry ajanga tweet ka nung ashi.

Opposition leniri bail fee timba akumba magütsüba atema

aputsüla, ta hopta tetenzüklen linük yimtiba, Tbilisi nung aliba court kati totuyuba agütsü.

Melia, shibai United National Movement nung tekolakba lir, pai osangbener dang ashiba agi, ken o benokba ya tang opposition telok ajemzüka yoktsü merangba nung shilem ka lir.

Taoba küm October ita parliamentary elections agiba indang result nung ajemdaker Georgia nung yimtenren tsütsü melangmepu adoka liasü, kong ruling party ajanga election nung tim masüba mapa inyaka vote agütsürtem mesüshi, ta longkak aiter aser opposition temi ashir.

2019 küm Russian MP kati Speaker menden agir Russia nung o osho nung o jembiba sülen longkak aiter meyirijang aikati Georgia indang parliament telungi aitsü meranga Melia anema ken o ya benoka liasü.

Riot police temi parnok ya ki telungi aiba nungi nokdang, saka nisung noklang aika yirua liasü.



Rome, Italy nung aliba Senate nung confidence vote agitsü lia February 17, 2021 nü o intepba sentong ka nung Italian Ato Kilonser Mario Draghi (temalen tiyongba) dena aliba noksa nung agur. Italian ato kilonser tasenba Mario Draghi-i Bodhbar aonung Senate nung confidence vote agiba nung takok nguogo. Senate nung vote 262-i Draghi'er sorkar busemer aser vote 40-i anemer aser vote ana magütsü.

Belarus nung osangbener ana tepuokdak ayu

Kyiv, Tsüklai/February 18 (Agencies):

Poland nung amenoka aliba TV news channel Belsat indang osangbener Belarus nung anati Tir Alexander Lukashenko anema longkak aitba tangokba mechi Belarus nung court kati küm ana tepuokdak ayutsü Brehostibarnü obendang agütsü.

Arishi küm 27 tain Katsiaryna Andreiyeve aser arishi küm 23 tain Darya Chultsova na ya November ita ki ka nungi apu, kong tenati longkak aitba tangoka liasü. Anogo ishika jakdang longkak aiter ka asüba atema nüburtemi longkak aitba tangoka lia tena ya apu.

Tenati longkak aitsü sentong yanglur item longkak aitba mapang tangoka liasü, ta tai tongloksü, saka osangbener tetsür ana yagi yamaji meinyak, ta nokdaka liasü.

Brehostiabarnü ken o jembiba mapang osangbener ana ya yin agi makang ama yanglua alidak shibanger liasü aser tena kati ka dak azüiter takok anguba temaitsü temeyong agi 'V' yanglua sayu, Tena okatsürtemi iba obendang jembishitsü, ta ashir.

"Darya aser Katsiaryna na reprangang - tashi tait, menürema aser kinungertem dang yin agi takbanga alidak nungi tatem salem ashir. Lukashenko-i asenok meraksatsütsü," ta bendang linük nung jenoka alir opposition lenir Sviatlana Tsikhanouskaya-i

Twitter nung ashi.

Tsikhanouskaya ya kidanger linük, Lithuania nung alir aser iba linük yagi Minsk dang "spiral of repression" anenang, ta ashi aser Poland-ia Belarus-i osangbener reshikangshia amshiba anentsüla, ta ashi.

Taoba küm August ita election agiba sülen Lukashenko-i yimsü asüba anema longkak aitba mapang nisung 33,000 dak tema apu. Pa yimsüsüba atsülangtsü mechi election nung tim masüba mapa inyak, ta pa den tokteper temi ashi. Pa ya Belarus kati ka ama 1994 küm nungi inyaka arur.

Longkak aiter anema tashiyim amshiba mechi anüolen linüktemi Minsk anema tenokdangba tasen agütsü. Lukashenko-i menden nungi alutsü memolunger aser Moscow-i pa yarir. Russia-i Belarus ya European Union aser NATO asoshi buffer state ka ama züingshir.

"Ni mapai aoshia kü takum bendanga agütsür aor. Rubber bullets aser stun grenades apokba nungi ni atsükteter. Kü den külemi inyaker kasa tia nung lir. Ni ajak lir: lanur, ni meimba mapa, konang aser tongtipangsa, tangatetba tejangja," ta Andreiyeve-i sangdong ka nung shia liasü.

Sepaitemi kanga sashia züka merenshiba sülen November ita mozü kidang arishi küm 31 tain Roman Bondarenko asüba sülen osangbener ana yagi longkak aiter tangoka liasü.

India nung Samsung Galaxy A12 sayaogo

Samsung Galaxy A12 goes official



- 6.5-inch HD+ display
- MediaTek Helio P35
- 48MP quad-cameras
- 5,000mAh battery (15W fast-charging)

91

mobiles

New Delhi, Tsüklai/February 18, 2021 (TYO): South Korea indang electronic company tetsüti - Samsung-i bendanglen linük kar nung Galaxy A02s den külemi Samsung Galaxy A12 sayaba sülen, India nung Samsung Galaxy A12 smartphone sayaogo.

Tang India nung sayaba Galaxy A12 nung quad cameras, 5,000mAh battery aser 128GB onboard storage angutsü. “Samsung Galaxy A12 ya Samsung Galaxy A11 den tatongtep smartphone alitsü aser device ya sentsü tapu asem nung sayaogo.” “India nung Samsung A12 - 4GB RAM + 64GB storage variant jenjang sen 12,999 aser 4GB RAM + 128GB storage option jenjang

sen 13,999 alitsü.

Iba budget smartphone ya Black, Blue aser White sentsü nung retail stores, Samsung website aser tongtibang online portal tem ajanga angutsü. “Reliance Jio customer temi sen 349 prepaid recharge nung iba smartphone ya sen 3,000 alang instant cashback offer nung alitetsü akok.

Vi network nung Galaxy A12 customer temi mezüng ita asem atema sen 299 recharge mesüra mezüng recharge asem nung double data benefits angutsü. Item online market ajanga exchange offer aser no-cost EMI payment option agitsütsü akok. “Samsung Galaxy A12 nung 6.5-inch HD+ TFT display aser octa-core

MediaTek Helio P35 chipset angutsü.

Iba smartphone nung 4GB RAM aser 128GB storage den Android 10 out-of-the-box inoka yanglutsüogo. Iba den bendenloksema, memory ulua aginürtemi microSD card ajanga phone internal storage ji 1TB tashi atsülanga amshitetsü. “Galaxy A12 tesülen quad camera setup angutsü, iba set-up nung 48-megapixel primary camera deb f/2.0 aperture, 5-megapixel ultra-wide-angle camera den f/2.2 aperture, 2-megapixel macro camera den f/2.4 aperture aser 2-megapixel depth sensor inoktsüogo.

Selfie atema, iba smartphone tejaklen notch nung 8-megapixel shooter inokja lir. “Tanga feature tsütsü reprangdangra, Samsung Galaxy A12 nung 4G LTE, Wi-Fi, Bluetooth aser GPS angutsü. Security atema handset nung side-mounted fingerprint sensor inoksemtsüogo.

Iba smartphone nung battery tasazük 5,000mAh alitsü aser USB Type-C port ajanga battery yagi 15W fast charging support asür.

Shinnyu yimtsüng nung solar light inoktsü



Mon, Tsüklai/February 18, 2021 (TYO): Mon District Administration den Global Himalayan Expedition (GHE) longjemer Mon District kübok Shinnyu yimtsüng nung solar light inoktsüogo.

“Solar Power amshia, Shinnyu yimda kilen 60, Churches aser Community Hall nung light inoktsü. Iba project atema CSR ajanga sen lakh 23 agütsü aser Global Himalayan Expedition-i iba yimtsüng nung solar inoktsütsü atema maparen ketdangsüa liasü.

Global Himalayan Expedition ajanga tezülen aliba tesemtem nung nübur nem solar light agütsüba maparentem achaayanger aser iba tentet

yagi United Nation Global Climate Action Award 2020 nguogo. “Iba project takok ngua inyakba atema, DC Mon, Thavaseelan K, IAS-i Global Himalayan Expedition dang pelaba metetdaksü aser iba tentet yagi Health Unit aser School tem densema yimtsüng aika nung solar power amshia light agütsüdar, ta DC-i ashi.

“Iba maparen tsütsü shilem tongti agia aser maneni nungitba atema DC-i Advisor DUDA, N Bongkhao Konyak danga pelaba shisem. Ano külen, iba mapatong pusemba atema, DC-i Shinnyu Village Teacher John, Shinnyu Village Council aser Shinnyu yimertem danga pelaba metetdaksüogo.



Akhoyatsür Wt.Imsuwala Jamirtsür February 18, 2021 anogo nung arishi küm 100 ajungba benjongmong Dimapur nung la alidak amongba sentong nung birthday cake awaba aser ken atenba noksa nung angur. La tang tashi tenüktelen ajak shitak aser chiyongtsüa lasasa soruchioka chiyongtetter. La ya Akhoya nunger küm noklang adena taküm alirtem rongnung tasembuba lir .



Nüngtugu kentener tekok Green Day-i ken ka sayatsü



New York, Tsüklai/February 18, 2021 (Agencies): Nüngtugu kentener tebur tekok - Green Day-i 'Here Comes The Shock' ta nüngja agütsüba ken tasen ka sayatsü ternemba lir. “Tongtibang streaming services nung iba ken sayatsü aliba tejakdang, Punk rock kentener mongin - Billie Joe Armstrong, Mike Dirnt aser Tre Cool nungeri Honibarnü (February 20, 2021) NHL Outdoors - Lake Tahoe hockey game nung iba ken atentsü terenemba lir.

sayaba sülen 'Here Comes The Shock' ken ya Green Day indang mezüng ken alitsü. “'Basket Case' kentener teloki ashiba agi, “Ken atemba mongpu tanaben tenzükhitsü. NHL sentong nung 'Here Comes The Shock' ken atentsü maongka anguba atema onok pelar.”

“Alima ajunga asüngba COVID-19 wara mapang, US chart-topper - Green Day pur mazüingi dang music tasen zülua aruogo aser parnoki ken tasen ka danga sayaa mali. “LP tasen dak sendakba nung asüngdangyaba mapang, Billie-i taküm November ita onoki LP tasen ka sayatsü akok.

“Onoki kensep ka mesüra EP mesüra ken ka dang asüyongjia onok ajak tebilemba balala lir. Item ajakji mapang dak dang

aket aser mapang tetemjen nung atalokra bilemba ataloktsü,” ta Billie-i ashi. “Taoba küm tetenzüklen, arishi küm 49 tain rock star Billie-i ken tasen trok zülur aliba metetdaksü aser 'Father of All...' producer Butch Walker den tanaben band külemi inyaktsü asoshi teimla aliba lemsatep.

“Ni kee/music aika zülüogo aser item kensü ajak kü mulung nung lir, ajiasünung, ni ken trok zülüadok. Külem band pur Mike [Dirnt, bass] aser Tré [Cool, drums] na den kodang ang ajurujar memetet, saka tangbo parnok dang kümdanga quarantine süa alitsü asoshi ni shiogo aser studio nung onok ajak tanaben ['Father of All...' producer] Butch Walker den longjemer inyaktsü Imlaa atar,” ta pai shisem.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjima agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam** contact no. 7627917983 / 7627998690 Address: Near Nagaland Gate, Lahorijan K/A Assam, tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM (Friday & Sunday only) Yours sincerely - Khaming, Add: 7th Mile, Dimapur



Pelaba Lemsateper

Ni rara tajung ji raraogo. Ni alizung tonga asemogo , ni tamajungji yuogo . “2 Timothy 4:7.

Tasoba 3-05-1951



Tasuba 8-01-2021.

Onoki kodanga amatoktsü makokba asür **Tzüknungtemsu (Unger)** pa asüba anogo nungi shirnoki sa nübo , rongsen , sarasadem aser shisatsü agi yaritepogo nenok ajak dang kinunger ajaki kangasa pelaba iba osang kakat ajanga lemsateper .

Tsungremi nenok mapa tajung asoshi tali moajangma.

Temeim, Kinungtsü, Chirmur, Semchir, Kinunger & Anükapang.

Lakhuni Baptist Arogo pelaba lemsateper

1. Arogo aser Yimden tenzükertem asoshi Leadership Training Arogoi ayonga 9-10 February 20201 " Kari Ni Mesayura Ni kechi koda angatettsü" (T. Mapa 8:31) omen nung ajemdaker Arogo tamendakdak Lai tesayuba aser tenzüker inakyim indang training Dr. Lulen Jamir, Good News Ministry nungi kanga junga lenyirtem nem tangatetba aser tesayuba agütsüa liasü. Tsüngrem tenüng sanga pa dangf Arogoi pelaba lemsateper.

2. 12-14 February 2021 anogo nung Mr & Mrs. Sashiwati (Mongoya Prayer Garden) par kibongi arogo nem revival sentong ayongzüka, Tsüngrem O jembir Mr. John Imsong, IEF missionary anir arua Arogopurtem ajungmesoa taküm aser tanela nung asentenshia temoatsü tulu anguba lemsateper. Par kibongi, nübo, rongsen aser taküm tenla Arogopurtem nem agütsüba den Chuchuyimpang Baptist Arogoi sarasadem tenla agütsüba asoshi Tsüngrem tenüng sanga pelaba lemsateper agütsüa.

M Bendang Lkr Secretary Lakhuni Baptist Arogo

Porto team-i goal 2-1 agi Juventus kokogo

IPL Auction 2021 nungi Mark Wood tukadok



Porto, Tsüklai/February 18, 2021: Bodhbarnü, Dragao stadium, Porto nung Juventus aser Porto na Champions League - round of 16, mezüing leg asayaba mapang, Moussa Marega-i Porto atema goal tanabuba idaktsür sülen agiba noksa ka yangi angur.

Porto, Tsüklai/February 18, 2021

(Agencies): Brehostibarnü, Champions League round of 16 asaya nung Porto team-i Italian asayamung takok angur telok Juventus madak goal 2-1 agi takok angu.

Porto-i Juventus akokba ya mezüingbuba alitsü aser parnoki mezüing o tanabuba half nung goal ka ka idaktsü. "Telok ana tsüingda asaya tenzüker, Juventus pur defence tsütsü mangmangtepang Mehdi Taremi-i Porto atema mezüing goal inoktsü aser tanabuba half nung Marega-i goal tanabuba idaktsüba sülen, Andrea Pirlo'er telok - Juventus kanga mejungi asaya liasü.

Ajisüaka, asaya tatemlen minute 82buba nung Federico

Chiesa-i Juventus atema goal ka idaktsü. March 09, 2021 iba leg nung Juventus aser Turin na asayatsü. "Asaya tenzüker minute ka sülen onok asaya raksadok. Tanü ama asaya tenzüker tangari goal ka agütsür sülen teimla samadoker.

Ajisüaka tiaka Chiesa indang

CHAMPIONS LEAGUE

goal ka ajanga taruba leg nung asayatsü lenmang ka ngutet. Onoki iba tashi asayatsü meimla aser iba yimya nungbo kodanga masayatsüla. Temulung agütsüra onoki iba dang nungi tajungba asayatetla," ta Juventus coach Andrea Pirlo-i ashi.

"Kasa Champions League 'round of 16' mezüing leg asaya tanga ka nung Borussia

Dortmund-i goal 3-2 agi Sevilla kokogo. "Dortmund nungi Erling Haaland ajanga goal ana tashi idaktsüba yong team pur kanga nungitogo. Iba asaya tenzüker, Spain team Sevilla nungi Suso-i minute 7buba nung mezüing goal idaktsü.

Ajisüaka, tesemdang team Dortmund-ia telangzüba tajung agüja Dahoud-i minute 19buba nung goal ka inoktsü. "Tatsüka dang lir, Norway nung forward asayar Haaland-i minute 27buba nung Germany team - Dortmund atema goal tanabuba idaktsü aser half time matongdang paisa goal tanabuba idakja goal 3-1 agi Sevilla tejakdang aküm.

Dortmund atema Champions League tenet nung Haaland-i goal 10buba idaktsür alitsü. Iba asaya atemtsü minute trok anünga lia, Sevilla pur nem teimla ka agütsütsü atema Dutch striker Luuk de Jong-i minute 84buba nung goal ka idaktsü aser ibaji ajanga March 9, 2021 nü leg tanabuba nung asayatsü maongka ngutet."

Iba asaya tenzüker Sevilla-i mezüing goal idaktsüba dak alaka, onoki aginüba ama mezüing half junga asayaogo," ta Dortmund captain Marco Reus-i ashi.

New Delhi, Tsüklai/February 18, 2021 (Agencies): Brehostibarnü, Chennai nung Indian Premier League (IPL) 2021 Player Auction nungi England nung Mark Wood tukadokogo. Bendanglen asayar tenet densema, Mark ya temaba jenjang - sen crore 2 nungi tenzüka auction asütsü renemer liasü.

ESPNcrinfo sangdong ka ajanga angazükba agi, Bodhbarnü Chennai nung franchise tem dang, fast bowler Mark-i par kibong den külemi amungtsü tebilemba nung iba auction nung madentsü telemetba agi. "India den Test series tasembuba asayatsü aliba tejakdang, Bodhbarnü Chennai nung Wood aser wicketkeeper Jonny Bairstow naprongla England squad nung denogo.

England aser India tsüingda Test series pezü nungi tasembuba test ya Ahmedabad nung February 24 nungi tenzüka 'day-night' asayatsü. "Pei pei talidak nungi meyipa aruba sülen, asayar ana - Mark aser Jhonny naprongla England tebur cricket team nung denogo. Quarantine nung amungba sülen, asayar anaprongla mezüing training



session nung denogo," ta England and Wales Cricket Board (ECB)-i ashi.

Test series pezü nungi, MA Chidambaram Stadium, Chennai nung India-i run 317 agi tanabuba test akokba sülen, team anapronglai asaya ka ka koka lir. "Iba Test series nungi India-i England madak tanabuba test akokba sülen, India team ICC World Test Championship indang final nung shilem agitsü asoshi tebilemstü adoker.

Police Baptist CC aser Whiskers CC nati kokogo

1BUBA CHAMPIONS TROPHY T-20

Dimapur, Tsüklai/February 18, 2021 (TYO): Brehostibarnü, Local Ground Chumukedima Town nung Nagamese Baptist Fellowship (NBF) Sports Ministry Chumukedima Village ajanga ayongba 1st Champions Trophy T-20 Cricket Tournament nung Police Baptist CC, Youngstars Club aser Whiskers CC nungeri pei pei tata asaya kokogo.

Mezüing asaya nung Police Baptist Church Chumukedima-i wicket 3 agi Big Shots akok. Toss koka Police Baptist CC-i fielding asütsü shim aser over

17 nung parnoki Big Shots nem run 89 dang agütsü. Police Baptist-i over 17.2 nung alizüing tongtet aser team nungi batsman 7 out asü. Subash-i wicket 2 agiba den run 16 yangluba atema pa nem man of the match award agütsü.

Tanabuba asaya nung, Youngstars Club-i run 45 agi Gorkha XI kokogo. Toss koka Youngstars-i batting shim aser over 20 nung run 244 target yutsü aser parnok wicket 4 out asü.

Tanabuba innings nung Gorkha CI-i kanga meranga asaya saka over 20 nung par

teloki run 199 dang yanglu aser wicket 3 tukadok. Iba asaya nung Mahidul-i run 88 yangluba atema pa nem man of the match award agütsü.

Kasa anogo tatembangbuba asaya nung, Whiskers CC-i BraveHeart Warriors madak run 23 agi takok angu. Whiskers-i toss koka batting shim aser over 20 nung run 178 target yutsü; aser asayar ajak out süadok.

Tanabuba innings nung, BraveHeart Warriors-i over 20 nung run 155 dang yanglutet aser wicket 5 out asü. Iba asaya nung Aditya Gupta-i wicket 3 agiba atema, pai man of the match jenjang angu.

ICC-i "CWC11 Rewind" series sayatsü

Dubai, Tsüklai/February 18, 2021 (Agencies): India Cricket team-i 2011 World Cup takok ngur küm 10 ajungba nüngtem nung, Hokolbarnü (19.02.2021) International Cricket Council (ICC)-i #CWC11Rewind ta nüngja agütsüba series ka sayatsü terenemba lir.

Iba series ajanga 2011 World Cup cricket asayamung mapang atalokbatem post 100 ajanga sayatsü. Item content rongnung, asayamung (2011 World Cup) mapang ICC website nung asaya sayuba indang minute 5 highlights, ICC social channel tem nung asaya shia nungi ajaki sapua jembitsüba asayar tajung indang highlights, lanurtem atsüa arutsü atema Instagram Reels content aser asayamung nungi tongtibang asayatem den interview balala agiba densema lir. "Iba content ya Hindi aser English oshi nung sayatsü. "Cricket sapur fans

tem atsüa arutsü temulungtetba nung, iba content ya English dak alaka Hindi oshi nung sayatsü renemogo, cricket wadang tsütsü nübur timba atsüa arutsü asoshi, #CWC11Rewind campaign ya ICC indang multi-lingual mapatong tetenzüker alitsü," ta ICC sangdong ajanga metetdaktsü. "India nung tongtibangsa Hindi-speaking market (HSM) nungi fans aika atsüa arutsü mechi, iba campaign mapang ICC indang Hindi Group atema post 100 dak tema content renemja lir," ta ICC-i ashi. "2011 World Cup mapang, India team asaya tuku nungi Hindi commentary den asaya highlights tem minute pungo sayatsü. "Taoba mapang India cricket team captain, Mahendra Singh Dhoni lenisüba kübok, India-i 50-over World Cup takok angu. Mumbai nung final asayadang, India team-i wicket 6 agi Sri Lanka akok.

Australian Open: Jennifer Brady final-i iogo

Melbourne, Tsüklai/February 18, 2021 (Agencies): Tang asaya aliba Australian Open asayamung nung Serena Williams tsükadokba sülen, America nung nem ano teimla agütsütsü asoshi, Brehostibarnü tetsür kija Semi-final asaya nung Jennifer Brady-i 6-4, 3-6, 6-4 agi Karolina Muchova tsükdaktsü.

Rod Laver Arena nung asayar ana tsüingda toktepba mapang, Brady-i mezüing Grand Slam final tongtettsü atema lai Karolina den kanga meranga toktepa asayogo aser Japan tsür Naomi Osaka den final asayatsü terenemba lir. US Open semi-final nung Osaka-i Brady tsükdakja lir.

Tetsür kija mezüing semi-final

asaya nung, 2019 Australian Open takok angula Osaka-i 6-3, 6-4 agi Serena Williams tsükdaktsü, saka 2020 küm AO takok marok angutsü atema Sofia Kenin-i Garbine Muguruza tsükdaktsüba sülen, taküm-a seed 22 Brady-i finalist ka ama United States nem teimla agütsüogo.

Iba asaya set tanabuba nung Brady-i match point pezü menguteti tamakok angu, saka mezüing set ama lai set tasembuba nung 6-4 agi Muchova tsükdakja semi-final

koktet. "Taküm Australian Open asayamung nung asayar 72 rongnung densema hard quarantine nung hopta ana tashi munga aser training magiteti arur sülen, Brady-i junga shilem agia final tongtetet alitsü.

Australian Open final tongtettsü maongka anguba atema ni kanga pelar. Iba jenjang ajangzüktetba ya ni atema kanga tulu lir. Lai (Osaka) Grand Slam ishiebenbo koker asünung, final asaya kanga tasak asütsü ama ni bilemer," ta Brady-i ashi.

BILEMDANGANG

"Mashimaluri jembiba nung tashitemeteteri teti shisadanger".